

# MYSUN pemangkin penyelidikan, pembangunan capai matlamat pembangunan lestari: Taufiq

UB 16.03.2022 P.02

Oleh Vivi Oliviana Najurus

**KOTA KINABALU:** Persidangan Kebangsaan Rangkaian Universiti Lestari Malaysia (MYSUN) Pertama 2022 menyediakan platform interaktif bagi membincangkan kemungkinan baharu yang mampu meneroka peranan universiti dalam mempromosikan kemampanan.

Naib Canselor UMS, Prof Datuk Dr Taufiq Yap Yun Hin berkata memandangkan asas pengetahuan universiti sentiasa berkembang dan kepakaran antara disiplin tersebar secara meluas, rangkaian seperti ini mewujudkan sinergi organisasi terutamanya dalam kalangan rakan kongsi universiti MYSUN.

Katanya, melalui persidangan platform nasional ini juga boleh menjadi pemangkin dalam menjalinkan pakatan penyelidikan dan pembangunan untuk



**TAUFIQ**

menyokong pembangunan lestari yang lebih baik di peringkat tempatan serta nasional.

“Melihat kepada pelbagai tema dalam persidangan ini termasuklah tenaga, perubahan iklim, sumber semula jadi, keselamatan makanan, kejuruteraan, teknologi hijau, sains sosial, serta teknologi maklumat dan komunikasi mampu mencapai matlamat pembangunan

lestari, khususnya keperluan untuk menggalakkan amalan penggunaan tenaga dan pemeliharaan alam sekitar yang baik.

“MYSUN juga mampu meningkatkan dialog dan perkongsian pengalaman serta amalan terbaik di peringkat kebangsaan melalui penganturan dua Persidangan Kebangsaan serta Bengkel mengenai Kelestarian Kampus,” katanya semasa menyampaikan ucapan aluan semasa persidangan terbabit.

Persidangan disertai beberapa universiti di Malaysia termasuk Universiti Malaysia Sabah (UMS), Universiti Teknologi Malaysia (UTM), Universiti Putra Malaysia (UPM), Universiti Teknologi MARA (UiTM), Universiti Malaysia Pahang dan Universiti Multimedia Malaysia serta Universitat de Alicante, Universita Degli Studi Di Genova dan FH Joanneum University of Applied Sci-

ences.

Menurutnya, beliau berbesar hati melihat pembabitan universiti bekerjasama dengan kelestarian dan UMS sendiri mengekalkan kedudukan antara tujuh peratus universiti paling mampan di dunia berdasarkan UI Greenmetric World University Rankings atau UIG.

Tambahnya, UMS berjaya mengekalkan kedudukannya sebagai universiti ketiga terbaik di Malaysia dan universiti ke-20 terbaik di rantau Asia dalam ranking dunia UIG 2021 terkini.

“Institusi pengajian tinggi memainkan peranan yang lebih besar dalam usaha ini dan melalui usaha kolektif ini mampu merealisasikan hasil yang diinginkan untuk memastikan kemampanan institusi, sumber dan alam sekitar kita untuk generasi akan datang,” katanya.